



**Breheimen  
nasjonalparkstyre**

**Postadresse**  
Postboks 987  
2604 LILLEHAMMER

**Besøksadresse**  
Skjåk utmarkssenter (v/Skjåk  
Almenning), 2690 Skjåk og  
Luster kommune,  
Kommunehuset, 6868 Gaupne

**Kontakt**  
Sentralbord: +47 61 26 60 00  
Direkte: +47 61 26 62 10  
sfinpost@statsforvalteren.no  
<http://www.nasjonalparkstyre.no/breheimen>

Skjåk IL v/ Simen Toven  
Skjåkvegen 1883  
2693 NORDBERG

**Saksbehandlar** Stein Magne Grevrusten

**Vår ref.** 2022/3254-2 432.3

**Dykkar ref.**

**Dato** 13.04.2022

## **Delegert vedtak - Breheimen NP – Honnsrøve NAT - 2022 - Dispensasjon - Utplassering av turpostar - Fjellgeita Skjåk IL v/ Simen Toven**

### **Vedtak**

I samsvar med delegasjonsfullmakt frå Breheimen nasjonalparkstyre gjev nasjonalparkforvaltaren Fjellgeita Skjåk IL v/ Simen Toven løyve til utplassering av følgande turpostar i Breheimen nasjonalpark og Honnsrøve naturreservat:

- Tundradalskyrkja i Breheimen nasjonalpark
- Rognebekktjønnin i Honnsrøve naturreservat
- Skåpet i Breheimen nasjonalpark

Vedtaket er fatta med heimel i § 3 pkt. 1.3 d og pkt. 5.2 i verneforskrift for Breheimen nasjonalpark og § 5 pkt. 4 i verneforskrift for Honnsrøve naturreservat.

Følgjande vilkår gjeld for løyvet:

- Turpostane kan stå ute og bli marknadsført i perioden 1. mai – 31. oktober 2022.
- Turpostane skal setjast opp der det er fast mark slik at det blir minst mogleg slitasje på terrenget der postane står.
- Turpostane må takast ned når sesongen er over og frakast ut av verneområdet.
- Nasjonalparkstyret kan be om at merkinga og postane blir teken ned og fjerna dersom ein ser at tiltaket påverkar verneformålet negativt.
- Talet på registrerte besøk på turpostane skal rapporterast til nasjonalparkforvaltar innan 31.12.2022.



Vi gjer oppmerksom på at dette løyvet berre gjeld i forhold til verneforskrifta for Breheimen nasjonalpark og Honnsrøve naturreservat. Søkjar er sjølv ansvarleg for å innhente eit eventuell løyve etter anna lovverk frå kommune og/eller grunneigar.

Vedtaket kan klagast inn for Miljødirektoratet av ein part eller andre med rettsleg klageinteresse, jf. forvaltningslova § 28. Frist for klage er tre veker frå vedtaket er motteke. Ei eventuell klage stilast til Miljødirektoratet, men sendes til Breheimen nasjonalparkstyre.

## **Dokument i saka**

- Søkna frå Fjellgeita Skjåk IL v/ Simen Toven, datert 16. mars 2022.

## **Saksopplysningar**

### **Søknaden**

Søknaden er attgjeven nedanfor:

*Fjellgeita ønsker også i år og ta Skjåkværene ut i villmarka.*

*For sesongen 2022 håper vi å kunne sette ut følgende poster. Skåpet og Tundradalskyrkja i Breheimen nasjonalpark og Rognebekktjønnin i Honnsrøve naturreservat. Sesongen strekker seg fra mai til oktober.*

*Posten består av en stempelpost og i tillegg vil det bli noen retningskilt strategisk plassert ved startpunkt og stiskiller for å vise vei. Alt blir fjernet igjen når sesongen er slutt, og vår aktivitet skal ikke lage noen permanente inngrep.*


*Fjellgeita har pågått siden 2004 og har etterhvert engasjert mange barn og voksne. For mer informasjon om vår aktivitet, se nettsiden Fjellgeita – Skjåk IL eller vår Facebookside.*

*Under ligger det skisse av hvor postene skal stå (markert med firkant), og hvor vi tenker det skal stå retningskilt (markert med trekant)*


*Håper dette er greit og at vi kan gjennomføre dette som tidligere.*



### Tundradalskyrkja UTM 32V (øst, nord) 434139, 6847499




### Rognebekktjønning UTM 32V (øst, nord) 438842, 6874460





## Skåpet UTM 32V (øst, nord) 444068, 6856130





## Heimelsgrunnlag

### Delegering

Miljøverndepartementet har i brev av 1. februar 2011 delegert forvaltningsmynde for Breheimen nasjonalpark til Breheimen nasjonalparkstyre. Dette er gjort med medhald i naturmangfaldlova § 62.

I medhald av styresak 7/2016 og styresak 2/2020 har Breheimen nasjonalparkstyre gjort vedtak om å delegere behandling av enkelte saker til nasjonalparkforvaltaren. Dette er gjort med heimel i nasjonalparkstyrets vedtekter. Vedtaket gjev nasjonalparkforvaltarane i Breheimen myndigheit til å treffe vedtak i saker som gjeld søknad om løyve etter verneforskriftens spesifiserte dispensasjonsbestemmingar, samt kurante saker etter naturmangfaldlova § 48 for verneområda i Breheimen.

### Verneformål – verneforskrift

Føremålet med Breheimen nasjonalpark er å ta vare på eit stort, samanhengande og villmarksprega naturområde som inneheld særeigne, representative økosystem og landskap utan tyngre inngrep. Vidare er føremålet med nasjonalparken m.a. å ta vare på eit høgfjellsøkosystem med eit eigenarta og variert biologisk mangfald, ta vare på leveområde til villreinstammen i Reinheimen-Breheimen villreinområde, vegetasjon og landskap, og å ta vare på kulturminne. Ålmenta skal ha høve til uforstyrra oppleving av naturen gjennom utøving av naturvenleg og enkelt friluftsliv med lita grad av teknisk tilrettelegging.

Etter verneforskrift for Breheimen nasjonalpark, er oppsetting av skilt og merking av stigar forbode i nasjonalparken (§ 3 pkt. 1.1 i verneforskrift for Breheimen nasjonalpark), med unntak gjeve i § 3 pkt. 1.3.

Forvaltningsmyndigheita kan gje løyve til m.a.:

- *Oppsetting av skilt og merking av nye stiar og skiløyper i samsvar med retningslinjer fastsette i forvaltningsplanen jf. § 5. (§ 3 pkt. 1,3 bokstav d i verneforskrift for Breheimen nasjonalpark).*

Forvaltningsmyndigheita skal også vurdere om organisert ferdsle kan vere skadeleg for naturmiljøet, jf. verneforskrifta: *Reglane i denne forskrifta er ikkje til hinder for organisert turverksemd til fots så lenge naturmiljøet ikkje blir skadelidande* (§ 3 pkt. 5.2 i verneforskrift for Breheimen nasjonalpark).

Føremålet med Honnsrøve naturreservat er å ta vare på eit tilnærma urørt skogområde som økosystem med alt naturleg plante- og dyreliv. Av spesielle kvalitetar kan nemnast at området er stort, det er lite råka av inngrep, delar av området har karakter av furuskog og det har ein av Europas største kjende førekomstar av arten ulvelav.



I § 3 i verneforskrifta for Honnsrøve naturreservat står det bl.a. at vegetasjon (medrekna daude busker og tre) er freda mot skade og øydelegging. Det er forbode å fjerne planter eller plantedelar frå reservatet. I § 3 pkt. 5 står det at bruk av naturreservatet til teltleirar, idrettsarrangement eller andre større arrangement er forbode.

Forvaltningsmyndigheita kan gje løyve til m.a.:

- *Avgrensa bruk av naturreservatet i samband med arrangement nemnd i § 3 pkt. 5. (§ 5 pkt. 4 i verneforskrift for Honnsrøve naturreservat).*

## Forvaltningsplan

I forvaltningsplanen for Breheimen nasjonalpark står det m.a. dette om denne type organisert ferdsel:

*Ved vurdering av søknad om løyve i verneområda skal det leggjast stor vekt på om aktiviteten medfører fare for slitasje og skade på verneverdiar. Det kan setjast naudsynte vilkår for eventuelt løyve.*

*Arrangement som bringar folk ut i naturen kan vere positivt for folkehelsa og folk si forståing for verdien av natur. Nasjonalparkstyret vil vere open for at det kan gjennomførast arrangement som er i tråd med eller fremjar verneføremålet (t.d. friluftsliv og kulturlandskap) så lenge dei ikkje kjem i strid med verneverdiar.*

*Søknadspliktig organisert ferdsel som kan vere i strid med verneføremålet skal leggjast utanfor verneområda.*

*Dersom eit arrangement like gjerne kan leggjast utanfor verneområda, vil det ikkje bli gjeve løyve til slike arrangement som krev løyve.*

## Naturmangfaldlova

Omsynet til verneverdiane i området blir vurdert, særleg i forhold til landskap, dyreliv og friluftsliv, jf. verneforskrifta § 2 og naturmangfaldlova §§ 1(Føremål), 4 og 5 (forvaltingsmål for naturtypar, økosystem og artar), samt § 7 (prinsipp for å ta offentleg avgjerd), jf. § § 8-12 (kunnskapsgrunnlaget og miljørettslege prinsipp).

## Vurdering

Tiltaket gjeld organisert ferdsel der turane er annonsert i lokalavisa, Facebook og gjennom ein eigen folder. Turorientering har stor oppslutning i Skjåk kommune og tiltaket er heilt klart positivt i eit folkehelseperspektiv. Turane er merka ved start og slutt, samt i stigkryss undervegs. Turane varierer frå år til år.

Utgangspunktet er at all ferdsel til fots, også organisert ferdsel er tillate i verneområda. I nasjonalparken er det likevel mogleg å regulere ferdsel som kan skade naturmiljøet.



Bakgrunnen for denne regelen er at ferdsel i nokre tilfelle kan medføre stor slitasje eller at det kan forstyrre villrein og anna dyreliv, rovfugl og andre fugleartar som er sårbare for forstyrring i hekketida.

Nasjonalparkforvaltar meiner at det er tilstrekkeleg kunnskap om området og konsekvensane av tiltaket. Med bakgrunn i databasar (Naturbasen og Artsdatabanken), forvaltningsplanen for Breheimen, ulike naturfaglege rapportar og generell kunnskap om området, er det god oversikt over kva som kan påverke natur og miljø negativt. Det er god oversikt over biotopar og artsmangfald i området. Ein del av desse blir følgd opp av lokalt personell frå Statens naturoppsyn i Breheimen.

Årets turmål innanfor Breheimen nasjonalpark og Honnstrøve naturreservat er diskutert med Statens naturoppsyn i Breheimen. Ut frå kjennskapen til villreinens arealbruk vil ikkje turpostane koma i nemneverdig konflikt med villreinen eller andre verneverdiar i den perioden postane skal stå ute (§ 8).

For å ivareta naturmiljøet kan forvaltningsmyndigheita bl.a. stille vilkår som har som formål å avgrense ein eventuell skadeverknad av eit løyve. Alternativt vil ein søknad kanskje bli avslått eller at tiltaket må gjennomførast ein annan plass.

Ut frå noverande vurdering meiner nasjonalparkforvaltar at det ikkje er aktuelt å ta i bruk føre-var-prinsippet i denne saka dersom vilkåra i saka blir følgd (§ 9). Turmåla varierer frå år til år slik at slitasje på stiar til turmåla vert reduserte. Med bakgrunn i at tiltaket er av avgrensa omfang er den totale belastninga liten. Det er vurdert at tiltaket ikkje vil medføre miljøforringing, men tiltakshavar pliktar å iverksette dei tiltak som er nødvendig for å sikre at naturmangfaldet ikkje skal bli skadelidande. Om ikkje dette blir gjort kan tiltakshavar bli pålagt å iverksette tiltak for å rette skaden i ettertid. Når det gjeld miljøforsvarlege teknikkar og driftsmetoder, blir ikkje desse vurdert i denne samanhengen (§§ 10-12).

Ut ifrå ei samla vurdering meiner nasjonalparkforvaltaren at tiltaket kan gjennomførast med dei vilkåra som er satt i tilknytning til løyvet.

Med helsing

Stein Magne Grevrusten  
nasjonalparkforvaltar

*Etter våre rutinar er dette brevet godkjent og sendt utan underskrift*

Kopi går til:  
Statsforvalteren i Innlandet  
Miljødirektoratet



Skjåk kommune  
Skjåk Almenning  
Statens naturoppsyn Breheimen v/ Øyvind Angard